

29 NOV 97

Asean - Forum

PERSIDANGAN DAN PAMERAN ULANGTAHUN ASEAN KE-30 BERMULA ISNIN

KUALA LUMPUR, 29 Nov (Bernama) -- Isu-isu meluas berkaitan dengan ekonomi Asean akan diberi perhatian dan dibincangkan pada Persidangan dan Pameran Ulangtahun Asean ke-30 yang akan berlangsung di Pusat Perdagangan Dunia Putra di sini mulai Isnin.

Persidangan itu juga akan membangkitkan isu-isu perkembangan antarabangsa mengenai kewangan, menilai ekonomi-ekonomi Asean dan menimbangkan cadangan kerjasama Asean dalam sektor kewangan, kata penganjurnya, Forum Perniagaan Asean dalam satu kenyataan hari ini.

Persidangan dan pameran itu yang bertema "Inisiatif Kewangan Asean Bagi Abad je-21" akan dirasmikan oleh Perdana Menteri, Datuk Seri Dr Mahathir Mohamad.

Penceramah-penceramah yang terdiri dari menteri-menteri kewangan Asean dan dari badan-badan kewangan antarabangsa akan memberi pendapat mereka pada persidangan tiga hari itu.

Mereka termasuk Pengarah Urusan Tabung Kewangan Antarabangsa (IMF) Michel Camdessus, penasihat ekonomi Bank Dunia Amar Battacharya, penasihat ekonomi kanan Institut Kewangan Eropah Pierre Petit dan pengurus lembaga pengarah Yayasan Maklumat dan Penyelidikan Lanjutan Yuichiro Nagatomi.

Pada masa yang sama satu pameran bertema "Perkongsian Strategik Asean dalam Perbankan dan Kewangan" juga akan diadakan ditempat yang sama dari pukul 9 pagi hingga 6 petang dan dibuka untuk orang ramai.

Sementara itu, kenyataan itu berkata Forum Perniagaan Asean juga akan mengadakan siri persidangan web pada halaman webnya di Internet.

Kertas-kertas kerja yang dibentangkan pada persidangan itu akan dipamerkan pada halaman itu dan topik perbincangan ialah "Matawang Asean: Krisis dan Tindak Balas", "Kes untuk Penyelarasan Dasar Ekonomi dalam Asean" dan "Asean 2020 : Masa Depan Kewangan Bersepadu?".

Mereka yang berminat untuk menyertai persidangan web itu boleh mendaftarkan diri secara online dengan Forum Perniagaan Asean pada borang yang disedia dalam halaman webnya di <http://www.asean-business.com>. --

BERNAMA

RA WAT